

Государствд махнд орулдж өгх гахас саяняр бордгдджана

Запади района „Пролетарская победа“ гидг колхоз гахас бордлгъна кӧдлмшиг саяняр кӱцӧджана.

Колхозд бордджах 502 толгъа гахас баяна. Тер гахасас 106 толгъа ончта таргъар государствд ӧгч. Наадк ӱлдсн гахас цааранднь бордгдджана.

Бордгдджах гахас асрдж-халадж йовх ӱӱрмӱд Губская Любовь Никифоровна болн Глушко Мария Ивановна гидг хойр колхозницс йир саяняр килмджан ӧгч кӧдлдж йовцхана.

Гахас лагерн эв-аргъар асрдж-бордгдджана. Тер лагерн эв-аргъар барджах гахасин гернь хойр анъглчксн гер: негиднь амрдж кевтдг, хойрдгчнь хот-хол иддг. Бордджах гахас кӱӱна дӧнъг угагъар, эврӧн хот иддж ясрдг яршгудас идцхана. Эврӧн иддг яршгудт дӱӱргад хагсу хот кечкхля, гахас эврӧн цадтлан идчкӧл, эврӧн ус уухар седхля, цӧӧгъар кесн савас хонъшаран дӱрӧд дархла, эврӧн гоодждж усн гарна, тегад гахас дурндан ууцхана.

Иим эв-аргъар гахасиг хотхоолар болн усар тетгхля, халадж-асрджах олн амтн керглдшго. Ӱлгӱрлхд, ӧмнь 500 гахасиг 4-5 кӱн асрдж, халадж баясн болхла, ода 500-600 гахасиг хойрхн кӱн халадж тетгна. Эдӱ метӧр гахас бордг колхозмуд болн совхозмуд ма на танъгъчд йир цӧӧкн баяна.

Тегад иим ӱзмджта болн чинр-та дамшлтиг цуг совхозмудар болн колхозмудар тархах керг-эркн тӧр болджана.

Баахн нааста гахас шулугъар чанъгърдж ӧстхӧ, таргълтха гигад, дакад мах болн ӧӧк бартхӧ гидж теднд концентрированн хот-хол болн минеральн хот: давсн, улан шавр, теермдгсн чолу, церд болн нань чигн кергта минеральн хот ӧгч борддж баяцхана. Тиигад цуг зоотехническ зокалиг кӱцӧдж йовх учрар, бордджах гахас ӧдр болгън нег толгъань 450-500 грамм кӱрч ӧсджана.

Ода эн колхозд 396 толгъа гаха бордгдджана. „Пролетарская победа“ гидг колхоз деер ӱкра ӱснас цагъан тос кедж гаргъдг завод баяна. Тер заводас цоксн ӱсна шаг зӧӧдж гахасиг бордна. Гахас баях гер цевр-цеерӧр бархин тӧля ӱр Губская Л. Н. болн Глушко М. И. хойр, ӧдр болгън цеврлдж, арчлж халацхана.

Бордджах гахасин чинань йир сан. Цааранднь борддж, ончта таргъар государствд ӧгхин тӧля эн хойр гахач шунмгъагъар кӧдлдж йовцхана.

Гаха халаджӧх ӱр Губская Любовь Никифоровна болн Глушко Мария Ивановна хойр май сард 206 кӧлснӧ ӧдр олдж.

Июль сарин чилгчӧр бордгдджах гахасас бас сан таргъар государствд ӧггдджана.

БАКАН АНЪГЪРГ.